

**FIESTE
DE PATRIE
DAL
FRIÛL**
1077 - 2021
944 AGNS DE PATRIE



Udin ai 12 di Setembar dal 2021

La capitâl dal Friûl e celebre la Fieste de Patrie

*La edizion numar 44 si à davuelte di gnûf in presince, cetantis autoritâts
intervignudis a Udin*

Intant che l'imni uficiâl dal Friûl si sintive in place Libertât, cjantât dal ArteVoce Ensemble, une bandiere lungje 9 metris e largje plui di 4 si è disvoluçade jù de Tor dal orloi parsore de loze di Sant Zuan, in place Libertât a Udin. E je scomençade cussì la cerimonie civîl pe 44e edizion de Fieste de Patrie dal Friûl, ai 12 di Setembar stât. Par picjâ su la tor chest grant drap celest cu la acule eraldiche colôr aur, simbul dai Furlans di dut il mont, il Comun di Udin che al à volût cheste iniziative, al à domandât l'intervent di une squadre di professioniscj specializâts.

La manifestazion di chest an, inmaneade dal Comun di Udin cu la poie de Regjon Autonome Friûl - Vignesie Julie e de ARLeF - Agenzie Regjonâl pe Lenghe Furlane, in colaborazion cul Istitût Ladin Furlan "Pre Checo Placerean", e je scomençade a buinore cu la esposizion de bandiere dal Friûl su la specule dal cjistiel, e subit dopo e je stade dite messe par furlan in Domo. In place Libertât, dopo de scolte dal Imni e de esposizion dal drap celest, si à lete la bole dal imperadôr Indri IV, che e je l'at di fondazion de Patrie dal Friûl. Stefano Ceretta, vicesindic di Gurize, la citât che e veve ospitat la Fieste tal 2019, al à po dopo consegnât la bandiere dal Friûl in maniere simboliche intes mans dal prin citadin di Udin, Pietro Fontanini, che fevelant de Fieste al à precisât: «Il fat che cheste edizion de Fieste de Patrie dal Friûl si fasi tal mê di Setembar, invezit che ai 3 di Avrîl, date de nassite dal Stât patriarcjâl intal 1077, al dimostre a clâr la determinazion dal popul furlan e la volontât di no rindisi ae pandemie che, cundut che si viodi une lûs ae fin dal tunel, o stin inmò vivint. Anzit, la idee di inserî cheste celebrazion te suaze di Friuli Doc e pant la nestre capacitât di trasformâ lis dificultâts in oportunitâts, compagn dal timp subit dopo dal taramot dal 1976. Vuê la situazion e je sigûr diferente, se no altri pal fat che la crisi e je globâl, ma o crôt che il popul furlan al rivarà ancjemò une volte a fâ la sô part, insegnant al mont cemût vignî fûr di cheste disgracie e dant di gnûf une lezion di organizazion, serietât e eficiencie midiant de definizion di un gnûf 'model Friûl'. Cun cheste imagjin o saludi ducj in maniere sincire: buine Fieste de Patrie dal Friûl!».

Cun cheste edizion de Fieste i organizadôrs a àn volût puartâ la atenzion propit su la impuartance de Bandiere dal Friûl. Par dâ valôr a chest «simbul di condivizion di valôrs», citant il president de ARLeF, Eros Cisilino, inte buinore des celebracions si à screade, intal Museu dal Domo, une riproduzion tatil dal drap di Beltram, l'esemplâr plui antîc conservât propit inte strutture museâl tacade de catedrâl, che di cumò e je ancjemò plui valorizade in graciis a un test di descrizion in Braille e a un gnûf furniment, interni e esterni. «La bandiere e je un simbul che ducj i furlan a sintin lôr, dapardut là che si cjatin intal mont. La sô impuartance, adun cu la impuartance che e à la nestre lenghe, a scuognin jessi tignudis cont ogni di e sigûr che i sindics, i aministradôrs regjonâi, i components des associazions culturâls, ma soreudut i nestris insegnants a son daûr a fâ tant in chest sens. La tutele, dut câs, e rive de iniziative dal singul, parcè che fin cuant che o fevelarin par furlan, o podarin sintîsi simpri plui furlans. Il furlan al è, in sens metaforic, chel pâr di ocjai che nus fâs viodi la realtât ae nestre maniere, duncje al è sigûr alc di une vore prezioûs, te stesse misure dal pont di viste di chei altris, parcè che nus insiore e nus rint unics». A àn marcât la impuartance de lenghe ancje Markus Maurmair, president de AcliF, Assemblee de comunitât linguistiche furlane, e Roberto Pinton, retôr



Comune di Udine
Comun di Udin

Cul contribût de
(L.R. 6/2015)



ARLeF
AGENZIE
REGIONÂL
PE LENGHE
FURLANE

In colaborazion oon



Istitût Ladin Furlan
"Pre Checo Placerean"

FIESTE DE PATRIE DAL FRIÛL

1077 - 2021
944 AGNS DE PATRIE



Udin ai 12 di Setembar dal 2021

de Universitât dal Friûl, intant che Geremia Gomboso, president dal Istitût Ladin Furlan “Pre Checo Placerean”, al à puartât la atenzion su la impuartance de bandiere, che o viodin svintulâ dapardut, ancje aes Olimpiadis di Tokyo pene finidis. De stesse tonalitât ancje i intervencs dal president dal Consei regionâl, Piero Mauro Zanin e de assessore regionâl aes financis, Barbara Zilli.

Il president al à ringraziât il sindic di Udin pe siele di tirâ sù la bandiere furlane sul cjistiel, ricuardant che chê dal Friûl e je une storie di cognossi e di insegnâ, lant daûr des olmis di pre Checo Placerean, e une identitât culturâl di trasmeti intes aulis des Universitâts ma ancje in teatri.

La assessore regionâl aes financis e à invezit invidât cun fuarce lis fameis a tornâ a sintî proprie la lenghe furlane, insegnante ai fruts, parcè che mantignî in vite il furlan al vûl dî dâ valôr a chel che al è stât inte storie e inte tradizion di cheste tiere, ma soreudut podê dâi un avignî sigûr.

La cerimonie si è sierade cu la premiazion dal concurs “Emozions furlanis in viaç pal teritori”, promovût dal Uffici Scolastic Regionâl e de ARLeF, e indreçât aes scuclis de infanzie, primariis e secondariis di prin grât, par dopo finî cu la proiezion dai videos “Lamps di Friûl”, fats dai fruts che a àn partecipât ai centris estîfs dal Comun di Udin.

=====

APROFONDIMENTS

3 DI AVRÎL, NASSITE DI UNE NAZION

La Fieste de Patrie dal Friûl e celebre il 3 di Avrîl dal 1077, la date là che a Pavie l'imperadôr Indri IV al fissà la nassite dal Stât Patriarcjâl Furlan. Il Stât furlan, cun a cjâf il Patriarcje, al veve sôs leçs, un so esercit, al bateve monede e al fo un dai plui grancj teritoris statuâls di chê ete. Intal 1420, dopo di une vuere lungje, al fo concuistât di Vignesi.

IL PRIN PARLAMENT IN EUROPE

Il Parlament de Patrie dal Friûl al è, daûr di cualchi studiôs, il plui antîc in Europe. Al nassè des assembleis consultivis dai nobii e dal clericât, clamadis dongje dal Patriarcje di Aquilee za dal secul XII par domandâ gnovis contribuzions in bêçs e in oms di armis. In pôc timp, dut câs, il Parlament de Patrie al cjapà su simpri plui funziions legjislativis, amministrativis e judiziariis. Intal Parlament, dongje dai nobii e dai eclesiastics, si sentavin ancje i rapresentants dai Comuns. Al restà in vore par cirche 600 agns, fin al 1805, cuant che Napoleon lu sierà.

UNE DES BANDIERIS PLUI ANTIGHIS DAL MONT

La Bandiere dal Friûl e je un drap cuadrangolâr maraveôs, fat di sede colôr grîs celeste, cun tal mieç une acuile che e à il cjâf voltât a man çampe. Il cuarp, lis çatis e lis alis a son zalis, lis sgrifis a son rossis. La sô divignince e rive dai timps dal Stât patriarcjâl di Aquilee, clamât ancje Stât patriarcjâl furlan, che dal 1077 al 1420 al guviernà, inte suaze dal Sacri Roman Imperi, la Patrie dal Friûl. Il vessil al jere part dal furniment funerari dal patriarcje Beltram di Saint Geniès, che al restà su la catidre di Aquilee dal 1334 al 1350, e che al finì la sô vite copât in maniere barbare par une conzure di nobii furlans. Il simbul de acuile, chest lu confermin i reperts numismatici, al jere associât cul Stât patriarcjâl furlan za ai timps di Volchîr di Erle, Patriarcje di Aquilee dal 1204 al 1218. Al drap



Comune di Udine
Comun di Udin

Cul contribût de
(L.R. 6/2015)



ARLeF
AGENZIE
REGIONÂL
PE LENGHE
FURLANE

In colaborazion cun



Istitût Ladin Furlan
“Pre Checo Placerean”

FIESTE DE PATRIE DAL FRIÛL

1077 - 2021
944 AGNS DE PATRIE



Udin ai 12 di Setembar dal 2021

conservât intal Museu dal Domo, si inspire la bandiere moderne dal Friûl, definide e ricognossude cu la leç regionâl 27/2001. E ven metude fûr in maniere uficiâl intai lûcs publics dal comuns di lenghe furlane dongje ae bandiere de Regjon Autonome Friûl – Vignesie Julie, a chê taliane e a chê de UE.

=====



Comune di Udine
Comun di Udin

Cul contribût de
(L. R. 6/2015)



REGIONE AUTONOMA
FRIULI VENEZIA GIULIA

ARLF

AGENZIE
REGIONÂL
PE LENGHE
FURLANE

In colaborazion oun



Istitut Ladin Furlan
"Pre Checo Placerean"